



海山存稿卷七

內集

涪陵周煌著

詩十首

恭慶

皇上六旬萬壽詩

謹序

欽惟我

皇上御極以來至仁育物盛德在躬居所而衆星拱當
秋而萬寶成敬

天法

祖類

帝禮神昭祀具儀奠璧獻牟表裏悅穆怡怡愉愉奉

皇太后禮極

尊崇顯燦翔洽上膺

萬壽下視百福醇洪鬯之德豐茂世之規仁滂施厚浹
於族親辨章惇睦湛恩厯鴻暢垓汭埏濡及九有

廟堂之上章程明密品式周備因天地以致化四海承
上教以成俗孩養萬物粲乎隱隱各得其所繼以年歲
三十五載

朝廷清明神靈歡喜五緯相汁產祥降嘏維

聖拓闢疆宇數萬里凡向風慕義者咸喁喁然陸訾水

懷延頸舉踵奔走來賀臣伏念庚辰之歲恭逢
聖壽五旬薄海內外羣請慶祝我

皇上聖德謙冲

詔以明年共舉典禮上洽

慈歡至孝昭孚靈貺景集茲閱十稔

聖節載臨正旦

綸宣勅遵舊典惟茲臣庶敬竢來冬用昭

慈慶於是禮舉賓興恩賜蠲復

鳳書所至沕穆曼羨邇遐舞迺

命春官聯事蒼靈奉塗昇駕掖

輦虔謁

陵廟七萃九旂唱糴轉轂周巡畿甸貢於析津

翠華臨蒞供億不繁肅禋淀靈省畊布澤釋囚舉廢淵
旋雲被人神協和

恩膏淪浹

勅明春舉東守之禮躬捧

安輿至於岱宗歡迎

釐瑞飭有司汎掃簡約毋侈毋擾降

絲綸者再三却遠邇之供帳天日所照雨露所濡歡呼
之聲殷雷相接莫不頌

聖天子仁孝覃敷洋洋熙熙普錫萬類也臣奉職越疆
馳心

魏闕仰

星輝於南極阻班賀於西清恭撰五言古詩一章敬祝
聖釐藉申舞蹈顧慚舛陋敢竭愚忱伏惟

睿鑒臣煌頓首稽首謹序

上章攝提格八月秋澄鮮輝輝老人星耀采角亢間上
麗

北辰樞紫微煥三垣灝氣接神光靈貺齊昭宣

御極卅五載行健

皇同天

聖節紀周甲干支合璇璣萬彙托長養長春孕埴埏
朝廷鬯醇和海宇樂安閒孰握富壽柄

一人運乾乾百昌共修齡

帝算逾義軒百千萬億旬

熙辰慶縣縣

龍飛閱三紀昇平譜

虞絃孝爲

聖至德本本江河源

天子盡愛敬推暨周中邊藎之爲

文德煥乎道彌綸發之爲

武功八荒入陶甄敷之爲

至治位育胞黎元燦之爲貞符萬祥合凝輯臣昔侍

講幄記注香案前

聖謨春洋洋史臣職排編臣昔扈

警蹕獮禮循秋旻吉行若

宸居勤政精磨研

宵旰所無逸

廟算包容全

巡守捧

安輿上洽

慈闈歡豈惟極

尊崇

至性淵其淵臣讀太學碑闕土古未聞上繼

列聖志建樹

巍巍勲臣奉使四方兆民各安便或耕或讀書能孝弟
力田工賈戒游曠雜居肆與廛農桑都順成歌舞無尤
愆臣至大海東益仰

聖澤寬其君臣風俗雖各異語言咸稟朔被化馴習熙
熙然以此知萬邦恭順如一焉頌

皇帝至聖歡呼況中原

聖德海浩蕩

聖壽天綿延萬方祝

嘏詞何益

先天先今歲千秋節

鳳綽下履端曰明年辛卯

聖慈八秩聯

慶典諸祀儀敬侍娛

金護特開

萬壽科兼普賜復蠲謁

陵禮淀神掖

輦肅恭虔凡畿輔赤縣

闔澤流淵泉遠臣戒迎趨供億除侈繁釋網而錄瑕下
益黃頭錢庶類登春臺油油發其妍繼

勅明年春迎

釐岱宗巔用具東守儀有司其慎旃五月

詔再下曰部旗大臣請抒稱祝心陳設趨御園此奏朕
弗許留承

聖母顏戒爲無益舉矧禁開經壇爵秩有差等一罷貢
獻煩朕敬

天勤民上承

列祖傳膺

昊蒼鴻眷孜孜期治安諸臣體朕心緝節非所論

皇言信大哉誦者同愧歎拜荷

天地慈感激摧肺肝大德必得壽豐功復桓桓所以上
古君各各歲萬千吾

皇握要道謨烈難悉陳蠲賑輒億萬懷保切痾瘼璧馬
奠淮黃四瀆安其瀾臣觀龕赭峰碧鏡澄三疊由來神
效靈實感

帝念殷

聖皇

聖母心覆育同至仁六旬

帝捧觴上壽八旬

親自生民以來未見史冊文臣稽首頓首遙企青瑣班
崔巍

玉皇居岌嶮補陀山

聖壽卽

慈壽於斯萬萬年

恭慶

聖母崇慶慈宣康惠敦和裕壽純禧恭懿安祺

皇太后八十萬壽詩

九章
謹序

臣聞孝經援神契曰德被天下澤及萬物者天子之孝也自古聖帝明王統御區宇坐致太平者有之求慈慶延釐徽音聿楙永錫介祉光昭景命躬至德之極隆承天庥之大備若是者蓋亦鮮矣故羲農吳項堯舜夏禹其大德莫不默符蒼顙而華胥安登附寶皇娥景嫫慶都握登修己諸帝母未聞躬享修齡庇垂黼展然則聖人在天子之位雖先後同揆而庭闈至福實未敢取必於天也欽惟我

皇上集羣聖之大成一六合而光宅執粹精之道鏡照

四海發祥流慶對越天地曷奕乎三十有六年德澤洪
茂黎庶和睦士食舊德農服先疇殊方別區奔走偕來
委質重譯填庭溢闕美政所托洪施所潤不可究陳今
歲在重光單闕恭逢

聖母皇太后八秩萬壽距我

皇上龍生之年璣衡甲子星紀一周昔則渚虹樞電昭
聖誕之符茲則曜璧星珠衍

慈寧之慶我

皇上仰體

聖慈旁流汪濊設科登俊推暨廣博至深至渥履端之

辰宣布

恩綸沛澤天下令百姓遍曉

聖德莫不霑濡方春始和式舉

東巡之典祇奉

安輿至于岱宗敬迓

崇禋以昭景福

六飛旋軫載臨

闕里配天之迹昭乎泗水之間

素王之道紀乎沂川之側載

頒彝鼎俾肅几筵學校蹈咏庠序舞歌橫經負耒者傾